

AKILOCOKINET
ALOKIDING
NGUNA AKIRE

ATUTUBET 3



**AYENUN NGUNA AKIRE NGUNA KA AKUJ KA
AMODIYO A SATAN**

**EKITAABO NGOLO KE
EKETATATAM**

Akilocokonet alokiding nguna akire. Atutubet 3.1: Ayenun nguna akire nguna ka Akuj ka Amodiyo a Satan
Copyright v3 ©2012^[1] Reconciled World, Phoenix, Arizona, United States of America. www.reconciledworld.org

Eyakaun ka itolomunitae etic lo anacamun angina a Creative Commons Attribution-ShareAlike 3.0 lincence.
Ikicamakinio ka ikisimukekinitae arokor etic ka akitolomuni, akorar ka akisiropor alorot alo:

Akiteyenikun – Itemokino kiteyenu etic anakimoriyarit ngakiro nu: Copyright © 2012. Itolomunit Reconciled World (www.reconciledworld.org) eyai tooma creative Commons Attribution ShareAlike 3.0 licence. Anguna ka ariamunia nguna alalak, taanyu www.creativecommons.org.

Nyerae nguna egyelanario – Nyemaikina iyong kisitiya etic lo anguna ka amucurusoo.



Ani kiitanit iyong akijulakin etic lo nangajep kus, kitaanyik info@tctprogram.org.

Ngakigireta daadang nguna ke Ebaibul mati acepaki itoodiunitae, elemunitae aloBaibul angolo ebusan, New International Version®, NIV®. Copyright ©1973, 1978, 1984, 2011 by Biblica, Inc.TM ingitakinitae acamakineta aneni a Zondervan. All rights reserved worldwide. www.zondervan.com The “NIV” ka “New International Version” ikes trademarks ngulu igirir alotooma United States Patent and Trademark Office by Biblica, Inc.TM

Nguna eya tooma

Akitatamet 1: Ikirae iwon ngulu ikilocokin?	3
Akisileerekinet.....	Error! Bookmark not defined.
Ngikisila ngulu ka Akuj	4
Toburosi atutubet 1	5
Akilocokinet alo Fiji	6
Atamatam	8
Akitatamet 2: Itemokino iwon orakas ngulu ikiyooki ngisubuna	9
Akisileerekin	9
Eemut	9
Akisyom Ebaibul	10
Arucokina ngina iyookino ka ngisubuna.....	11
Ngatameta angiticisio angulu ka amina	11
Aburor.....	13
Atamatam.....	14
Akitatamet 3: Epedorio iwon akilocokin nguna amoi.....	15
Akisileerekinet	15
Akitegelaan	16
Aruwor itunganan ngini iyauni akilocokinet	16
Agolokinet	20
Totamatama ka kiwuakis lotic	20
Akitatamet 4: Ikiinakinit Akuj iwon nguna alalak.....	21
Akisileerekinet.....	21
Akisyom Ebaibul	21
Alimunun ngatamanakinet yok nguna alunyar	22
litana iwon ageun aanyun nguna daadang ikiinak iwon Akuj.....	22
Ngiketak	23
Akitatamet 5: Satan emodianot	25
Akisileerekinet.....	25
Animodiyo ikilimokinit iwon Satan?.....	25
Nyaanu nguna eyaunete ngamodianakineta nu?	27
Alipite ikilemaria iwon nguna ka amodiyo?	28
Akitatamet 6: Aripikin nguna iitana	29
Akisileerekinet.....	29
Ngikalya	29
Atukot	30
Akisibak ngiticisio	30

Eringa Iyong Nyegelkina

Asubanakin anguna ka akitatam

1. Tosyom ka amisizaarit akisileerekinet a eketataman, ngarwa nguna alalak erae kepedor. Kigir nguna apolok nawae anguna ka atamunit nguna apolok.
2. Kiwaru nguna elosikinit ngina kitatam, toyenunia nguna emaikina ngikasyomak kisisaut ekau.
3. Tosyom ekingaren ngasiometa daadang alobaibul.
4. Kisieme ekingaren ngiboro ngulu iitana alotooma ngina kitatamet, ka toanyunite atemar isubak ngakaritasia nguna angikasiomak (nguna iinakina) ka tosubak ngitorubei ngulu isitiyae anakitatam.
5. Toyeni ebe iyenunit iyong ejok ngolorot ka nguna kitiya anakitatam ikwa (ngaboliasio, ngitorubei). Ipedori iyong akisisakin ke ekal ka ngikonei kon.
6. Yaa apaki akilip neni ka Akuj tosubakinia ngikasyomak, kiirariata nguna ecamit Inges ka ikingarakinia Inges iyong akitatam ngakiro nu. Totamunite ebe erae anagogong ka Akuj bon ikipedoria iwon aanyun ngitunga ibelekin.

Ngirotin ngulu ikingarakinete anakitatam

1. Toyakaun nakibois ngina isitiyae ekingaren ka tosubak ngiboro ngulu iitanit iyong anakitatam.
2. Tosaanak akitatamet. Togeu anapaki angina iyookino anguna ka akiyan ka nguna kitiya ka apaki ngina kiengunet. Alosikinet erae toyakaunotor ngitunga apaki nginayenunet ka kiirasi ejok nguna itatamire daadang. Epedorete ngatutubeta nguna itatamere akiya atutubet kori apaaran daadang.
3. Toburonori anginapaki. Anageikinet a akitatam kituburo nguna daadang adaut ikes akisyom. Ingarakini akinyagonokin ngitunga atamun nguna adaut ikes akiirar.
4. Kiwuapite akisileerekinet ngina ke eketataman ka nguna isubakinit iyong.
5. Kiwuapite ejok anginakitamet ngatutubeta nguna omwon nu:-
 - a) Kisileerek ekoi – Erucorete ngiticisio aloyakae kec ngikoyo ngulu ke ekingaren.
 - b) Kikobak ngakiro nguna kitete – eya ngirotin ngulu alalak ngulumoret nguna kitete.
 - c) Inaki ngikasyomak ngadi kaapei ka nguna adaut ikes asyomun – itepedorete nguna itiyakinio akiteyenun nguna kitete anakitiya ka ngulu, anasubanakin idiobore kori akisitiya nguna kitete alorot ke edio.
 - d) Arucokin nguna kitete nu nakiyar kec – erae na adoketait anguna kitiya ka ingarakinete ngikasyomak atiakun ngirotin ngulu iwuakineta ikes nakiyar kec nguna kitete alotooma nguna ariamut ikes. Akisiom emam akiwuakin lotic nguna eirar nyibelekinete ka erae kongin.
6. Toburo ngikisila ngulu itatamere ngitunga ngulu apolok ka ngirotin ngice ngulu itatamere ngitunga ngulu apolok ka ngirotin ngice ngulu itatamite ekarikon alorikitene – ikwa:-
 - a) Inaki akisileerekinet ngina etakani.
 - b) Kingit ngakingiseta nguna eyaunete ngabongokinet nguna egelegelia.
 - c) Kitalaka ngitunga anguna ka arucokina anakitatam.
 - d) Nyilimok ngitunga nguna epedorete ikles make aripun anakitatam.
 - e) Kitogogong nguna sek eyenete ngitunga ka toyenu nguna eyenete ikes.
 - f) Kiyapara ka kidareu tobongokis ngitunga
7. Kisimukekinit ngitunga daadang kiyanete, tomorete ka tolimununuyete ngadi anginitungan. Kiwaru ka apatanu ngirotin ngulu ipedoria akisimukekin ngitunga ngulu ekuriaka pa isurumit ngileec.
8. Kilipi Akuj apaaran daadang ikisileerekinio iyong ngiboro ngulu kitet ka lokasyomak.

Epote ngolo kisitiyaet ekitaabo lo ngolo ke Eketataman

1. **Ngiboro ka anguna elosikinitoe:** Egeuni ngina kitatamet ka atutubet.
 - a) **Alosikinet** – Emaikina ngikasyomak toriamut nu anadaunet angina-kitatamet. Ejok akingitakin iyong bon erae keriamuna nguna ka alosikinet ana kedaun akitatam. Yaa apaki aburor ngatameta akingarakinia ikes atamun.

- b) **Ngiboro** – Angina-kitatamet imarunitae ngiboro daadang, imoriyarito lu ngitorubei ka ngakaritasia nguna einakinio ngakasyomak.
Ipedori iyong aseun ainakin ekitaabo angikasyomak kori isubakini ngadi lopite ngolo elimunitere anakitatamet. Ikingitakinit isua dang toya ngakaritasia nguna apolok nguna igirio, abao anguna ka atukot angina alalan.
- 2. **Nguna ke Ekarikon:** Eya alotooma akitatamet ngirotin ngulu ikingarakinete arikon ekitatame ejok. Nyemaikina nu tomorae ka ngikasyomak. Tosyom ekingaren anguna ka asubakinor akitenikin ekiyan ka nguna kitiya. Eyakasi ngakingiseta ngace ka ngabongokinet tooma nabuk anguna ka akingarakinia iyong ekarikon ayenunia nguna iitana alokasyaomak (Igirir nu anganyukutae anguna edisyak). Nyerae nu ngabongokinet nguna ajokak make, nai ngadi anguna ajokak.
- 3. **Eyakae ke esaa anguna ka akiwuapit ejok:** Nyiwuakinitae epite ngolo iwuapitere esaa tooma ngina kitatamet.
 - a) Yaa apaki ngina itemokino anguna ka akingarakinia ngitunga akisisaunia nguna etatami. Epol nooi ayenut nguna esiomete ngitunga akilo akirikakin akitatamet alosaa angolo esubakinitae.
 - b) Totamunite ainakin esaa ngolo egeikiniata ngikarikok akilip, akitomor nguna etiyannun nakiyar kec, akimor ngunakiro eyakatar ka akilipa ka apei.

Akitatamet 1: Ikirae iwon ngulu ikilocokinitoe a?

Ngatameta nguna apolok

1. Eyauni akiwuapit ngikisila ngulu ka Akuj akiyar ka akiterereng, eyauni amamukau akiwuapit ngikisila ngilam ngulu ka akulyako.
2. Ikwa ngikiristo emaikina akiyar yok kibelesin anatupit ikiwuapit ngikisila ngulu ka Akuj.

Ngiboro ngulu iitana

1. Ngitorubei – ngitorubei ngulu angakadia a Fiji (ngakadia 11)
2. Ngakaritasia nguna apolok ka ngakalamwa nguna apolok

Akisileerekinet

Nguna ke Ekarikon: Tosyoma ngiemuto lu.

Eemut 1: Rwanda

Erae Rwanda akwap ngina edit ngina eyakatar etyae angitunga angulu erae ngamilionin 8.2. Ngikaru a 100 ngulu alunyarosi, amame ngikristo anakwap angina, nait anageunet angikaru a 1990s apotu ngikelesiyae kori ngikanisae toyakaun lowaitin daadang. Apotu ngitunga ngatomonikanikauni ka ngikan anamiat toruworos ngikristo alo Rwanda. Ageuni arionget ngina angigurupo anakiteteun angina abu kirimo akwap ngina alodide ngikirionok alotooma ekaru 1940s neni aponiata ngamilionin tolakunos. Alotooma ekaru 1991 ka 1993 apotu toyakaun ngikeserak ngulu ke ewanjeli alorooma ekokwa ngolo apolon neni aponiata ngulu alalak tolakunos. Kikote neni dang, alolap angolo angiuni ka ngolo angiomwon ekaru 1994, abu ekoi ngolo etubulon tobwangun, ngolo aponiata ngitunga a milion 1 totwaketa ka ngamilionin 2 toema kinga akwap kec. Ayauni earit ngol alo Rwanda arae ngiman ngulu angikabilae. Apotu nu kitiyaun isitiyao ngilengia meere ngibomwo kori ngatomian. Anakwap angina arakatar 85% ngikristo. Apedorete ngikristo ngiarei aara iteosi make angilengia. Pa ipedori akinup ngiemuto ngulu aronok apotu kitiyakin. Apatana akiirar ngiemuto angaberu anguna aponi kiteperoi ka toarae alongaren ngidwe kec, atatoto itinganakinio akinuk ngidwe kec eyarete. Emam ipei dang anakwap epedori akinup ebe epedorete ngatuketa angikristo ngunaurei nu adingakin nooi make.



Eemut 2: USA

Alotooma USA iriamuni iyong ngikelesiyae/ngikanisae alowatin adaadang. Ipedori iyong akipup aradiyo ngina angikristo aneni iyai iyong daadang kori akitere esinema ngolo ka a TV aneni daadang ilosi iyong. Eyakasi ngisukulo ngulu angikristo natukon nguna alalak kaapei ka ngisukulo ngulu apolok ngulu a University. Eya ngikitaaboi ngulu nyimarun, ngakaritasia nguna egelegelia nguna angiemuto. Kikote neni dang, etwakete ngidwe apei amilion ka ngamiyae ngakan ngulu eario angolokaru anguna ka abwanganun. Ngikalya ngulu edolito atutubet eyakaunun natyakatyaka. Nyerae etyae lo ngolo angulu nyerae ngikristo bon. Lumokini, atyakatyaka angikalya ka abwanganun angidwe ikwaan etyae kec alotooma ngikristo.



Eemut 3: Brazil

Alokoding angolol ngina ka Amazon eriamunito ngatuketa ngun ngican nooi ka etwakete. Erae erot ngolo epedorere adolokin ikes akidok atuba. Ngikaru ngatomoniuni ngulu alunyarosi amam ngikristo ngulu ayenio anatukon anu. Ngikaru ngatomoniuni ngulu alunyarosi apotu missionaries potu nakwap na angatubae ka kiserata akirot ngina ka Akuj, apotu ngitunga tolakun. Apedorito Missionaries akiboi adiopaki, todupakis ekelesiya kori ekanisa ka angun, kiroposi nabo natuketa ngunace. Tokona ani kilot iyong neni, ikalouni anerae eringa ngireria ngulu ekulyakaka nooi. Emamukatar ngitunga angireria alu nguna itemokino anguna ka akimuj. Epeiro ngolo eriamununueta ngikalya ngisilinga erae akipanganar ngidwe kec ngulupesur ikwa ngamala edolito ngikaru kec ngitomon angiyaarei kori ngiuni bon. Iteyakaunete atapapa ngidwe kec ngulupesur lu yaasi ngikabarak anatuketa. Itiyaete atapapa ngulukristayaon dang ngunapei. Akipangaar ngikecedwe anguna angisilinga

- Anu apotu kitiyakin alotooma ngolo eemut?
- Ikituumokinete ngiemuto lu kori emam? Anguna ainyo ikituumokiniata?
- Anu itamakinito iyes atemar eyakatar Akuj alotooma epite lo? Anguna ainyo?

Eemut 4: Ere ngolo alomoru

Ayai ere ngolo adit lomoru. Ayai lowae ngolo akulyakana anakwap ka ayarete ngitunga eyare ngolo apatana. Amamukatar ikes nguna etomokino anguna ka akimuj. Ayakasi ikes emisiyarito epite ngolo ebunio akiru ka etiyaete alotyae ka akimuj alokaru angol. atemar eyakaun ngina itemokino kori emamukaun? Amamukatar ikes ngicoronin ka eboiyete anakais anguna etemokino. Pa arae ikes ngitunga ngulu pa alakara nait etiyaete ka agogong anakitare. Emunikinito angolokaru.

Ngikaru ngatomoniuni ngulu alunyarosi apotu Missionaries potu nakwap na ka tolimokis ikes nguna a Kristo. Ani iirarete ka toyenut apotu togeut akinup ka apotu ngulu alalak toruworos ngikristo. Apotu Missionaries kingarakis ngitunga akiduk ngikelesiyae kori ngikanisae. apotu ngitunga nginapaki toloto akilip. Apotu ikes tolakaros anerae ayenete ebe ani etwakete ikes elosete nakuj ka edarito ikes ka alakara akolongit ngina ajokan angina ikoni ngin ngina iriamakinotor ikes ke Ekalakunan Kristo.

Apotu Missionaries toesikis akwap ngin ka apotu ngikelesiyae kori ngikanisae torucoros anarikokin angikarikok ka akwap angin. Kelunyar ngikaru ngatomoniuni, apotu Missionaries tobongut, abu ekelesiya kori ekanisa topolou ka apotu ngitunga inaki akiriamanakin kaapei. kikote neni dang, apotu ngireria kidongo ikote neni pei. Aringa ikes eya nakulyako ka egwangakina loyaka ngolo elosio ekaru erae keyakaun nakoro kori keyakaun nguna itemokino anguna ka akimuj ekaru ngol. Apotu ngicoronin torubakis emamete anatukot kec. Ngadikidio bon apotu kibelesin.

- Anu apotu kitiyakin aloemut alo?
- Ikituumokini eemut lo a? Anguna ainyo kori ikotere nyo nyikuumokinia?
- Anu ikwaan anguna ke eemut alo ka ngiemuto nguluce?

Alorotin angidi nyetakani eemut ngolo esidion lo ikituumokini iwon ikwa ngiemuto ngulu uni nguluce ngulu ke ekingaren itiyaasi nu angina paki. Nait ikwaan ka nguluce eemuto. Angina abunio akristianu tolakunia ngitunga, nait nyilokokino akiyar kec. Ecamit Akuj akiyar yok togelaana ane alokwap, nyerae anakuj bon.

Ngikisila ngulu ka Akuj

EKIYAN ANATUKOT ANGINA ALALAN KORI NGINA CICI

Tosyoma ngikisila 30:11-20.

- Alipite itamunitor Akuj ngikisila Keng? Egogong ikes kori epatana?
- Alongaet angolo 15 anu nguna etyakunitae anguna yok? Anu icamakini iyong?

- Anu eyaunete akiyar ka akiterereng? (engaet.15-16)
- Anu eyaunete atwanare ka ngilam? (engaet.17-18)
- Anu ecamit Akuj iwon oseutu? (engaet.19)

Tosyoma Ngikisila 28:1-14.

- Anu etakanunete erae kikiwuap iwon ngikisila ngulu ka Akuj?
- Erae ngakiikineta nu nguna ka akiyar yok kedaun iwon atwanare kori nguna ka akiyar yok alokwap?

Tosyoma Ngikisila 28:15-19.

- Anu etakanunete erae pa kiwuapakin iwon ngikisila ngulu ka Akuj?


Iwuakin it Akuj ngikisila ngulu alalak ngulu ikilimokinito iwon erot ngolo emaikina iwon oyariata. Eya ngikisila ngulu angipitesia ngulu emaikina kipukato ajokis ngina aitunganan. Ikwa akitoodikinet, “Nyemaikina iyong tolom” ka eya ngikisila ngulu ikisubunitere ngulu ipukato ngiboro ngulu epedorio iwon aanyun. Akitoodikinet, eyakatar nginakolongit ngisaae 24 kori iitanit ekitoie ngakipi topolounio. Ani kikiwuap iwon ngikisila ngulu ka Akuj ejokuni akiyar yok. Iitana iwon ayenun ngikisila kori ngakiciket nu ka ageun akiwuakin ikes nakiyar yok. Ikwa ikitiyaa, eanyunio iwon Akuj itererengi akiyar yok.

Toburosi atutubet 1

Toanyutu etorube 3 anatatubet angina ka 1 anakitatam ka 1

- Anirucokina eyakatar ngitorubei lu alokiding kec ka anu eweikinito ikes?
- Eyakatar Akuj ngikisila kori ngakiciket anguna angirotin alu angipepei a? Nyaalu ngidi ngulu ipedori iyong atamun?

Eyakatar Akuj ngikisila ngulu epedorere iwon akisitiyaa ngarucokinetu nu angapepei. Ikiinaki Inges iwon ngakiciket akingarakinia iwon opedoriata akisiyookin ngiwaitin lu angipepei ka anakinyakunia arucokina ngina aponi kinyasunae. Kire jik, nyeruwor ikes ngulu ajokak mati ngina ebongunio Yeso nabo nait emaikina ikes tojokut.



Anakitatam angina ke ekau ikipotu isua etatama nguna ka akiteteuno. Anapaki angina arae ngitunga ngikulyak, mati ngidi ngulu abarak ngulu arae ngilopeyek ayakatar ngalup ka ngikalya angirwosi, arae ngitunga neni lala ngikangican ka anyamit akoro.

Alotooma ngikaru 400 ngulu alunyar abu akiteteunet todol nakwap ngina alokiya ngikakwang. Nginapei alotooma apaki ngina ke ekingaren apotu ngitunga make kisyakis akisyom Ebaibul, nyidareuno ikes epaderit kori epasitiat alimokin ikes nguna ebala Ebaibul. Apotu ikes togeikis akisyom ngikisila ngulu ikisubunite ka ngulu angipitesio ngulu abu Akuj todokok nakwap. Aponi ngikisila lu nginapaki ageikinia apaki togeunae akitatam akilo alokanisae kori alokelesiyae ka alosukulo. Anakitatamet ana apotu ngitunga togeikis akibelekin – apotu ikes togeikis eyaare akiyar kec alotooma ngatameta nu nguna kitete nguna apotu ikes kisisaut. Anakitoodikinet, apotu ikes toyenut ebe abu Akuj itolimok iwon akitiya ka agogong ikwa esibitor ikitiyae anguna Keng ka meere anguna aitunganan. (Nyiepeso 6:7). Apotu nabo ikes toyenut ebe iitana iwon ainakin ka akingarakin ngulu.

Ani ibelekinete ikes ngatuketa kec ibelekinosi ikes dang. Aponi kitaunae akimuj ngina alalan ka abu totakanu emore ngolo angiboro. Aponi kitogogongoi ngikalya ka ngatuketa ka apotu ngitunga ngulu alalak toloto

losukulo anguna ka ariamunia aosou. Apotu ngakwapin ka ngakwapin alotooma akwap angikakwang kiyotosi anakulyako.

Anakiwuapit ngikisila ngulu ka akuj apotu ngakwapin nguna alokuju akwap ngina angikakwang tobara. Eyauni aesikin ngikisila ngulu ka Akuj akulyako. Ani kikicamit iwon alomun anakulyako iitana iwon ageun ayenun ngikisila lu ka ageun akiwuakin ikes loticisio.

Ikiinakinitae iwon Ebaibul ngolo irworit anguna angikisila ka Akuj daadang, iitana iwon ewuakisi tooma lowaitin ngulu ka akiyar yok dadang. nyitemokino iwon aponare nakilip lokelesiya/lokanisa angolosabit bon. Ecamit iwon ewuapakisi Inges anapakio a daadang. Ani kikitiyae iwon nu ikiyanyuni akiyar yok ejokuni. Meere nait angun atemar ebe eruwor akiyar yok jwijwi ngina epatana. Ani kikingolik iwon akiyar ngina a Paulo ikiyanyuni ebe ayakatar inges anginapaki ationis. Nait ikiinit Akuj iwon arerengu, ani ikinupit iwon anakeroru Keng. Abu Paulo dang tocam ka toriam alelyanu anatiokisyo anguna abu inges toriam.

Akilocokinet a Fiji






Nguna ke Ekarikon: Kisitiya ngakadia nguna ke esinema anguna ka alimokinia eemut lo anguna a Fiji.



Ikwa ilosioto iyes akiirar eemut ngolo etupakini, tolamakisi epite ngolo ilosioto iyes abongokin ngakingiseta nu:

1. Nyaalu ngirotin ngidi ngulu egekiniata ngitunga akiwuapit Akuj?
2. Nyaalu ngirotin ngidi ngulu apotu ikes toanyut Akuj itererengi ikes?

Ngakadia nguna angitorubei a Fiji

<p>1. Akisileerekin</p> 	<p>Erae Fiji akwap ngina edukunito ngiculeta322 ananam. Erae akibois ngina ebusan ngina eminasi ngipeyok ngulu eponenete anakwapin. Elosenete ngitunga nguluyenen neni anguna ka akiengunia. Itorunit ebari ngolo ka akwap angina erae lopeyok lu. Erae ngitunga ngulu iboiyete anakwap angina 850,000, erae anus angitunga alu ngulu a Fiji ka anus erae Indian.</p>
<p>2. Ngatiokisio nguna apotu totakanut</p> 	<p>Alolap angolo angikan ekaru 2000, aponi kimasarae apukan ka aponi kikamarae ngikepukak edodakinitae ngatomian togoloi ngirwa 56 – todaun aemet anguna ka abucar lorukudei, abu aruruma toyakaun ka apotu ngitunga toaras make. Apotu ngasigaria tolukin, tari anapaki angina aponere tolakakinere ngikaplok apukan aringa akwap ingodia. Apotu ngikalotok tojongoto aponare angun, pa apedorito ngitunga agyelanar ngiboro lokalotok.</p>
<p>3. Apotu ngikelesiyae/ngikanisae tocunakinos</p> 	<p>Pa etiyaete ngikelesiyae kori ngikanisae ngulu a Fiji kaapei kori pa engaranakinosi make. Akilo ngun, eloiloasi ikes make. Nait apotu ngikelesiyae kori ngikanisae toanyut ebe eitana ikes acunakin kaapei ka kilipa anguna ka akwap kec. Ngina asubakiniata ikes akiriamiriam kec ngina ke ekingaren, mam pa ayenete ikes atemar epote ngidi nait abu akibois kilelebun ngikarikok angikelesiyae kori angikanisae. Apotu ikes toyeyut ekitiyae kaapei ngolo kitete. Abu arionget ngina angikarikok temasi ebe paaran sek atamete ikes anguna kec angilopeyek. Nait tokona apotu toanyut ebe anikecamito ikes Akuj kiterereng akwap kec emaikina ikes kitiyata kaapei.</p>

<p>4. Abu ekapolon ngolo ka apukan kingit akitimo</p> 	<p>Alolap angolo angikanikaarei 2001 apotu ngikristo ngulu ka akwap angina daadang potu kimorikinos anguna ka akilip ka ngakitatameta nguna ke Ebaibul. Anadaunet apaki abu ekapolon ngolo ka akwap ngolo aweikinit ekicolong ngolo ka apukan kilip. Abu inges kingit Akuj akitimo ka akiten inges ikotere ituruuni inges Akuj. Adiouriyen alotooma ngun aponi kisiboikinoe inges lokicolong ngolo sek aweikinit inges aloculat a Fiji ka abu kiwaru ngikarikok nguluce ngulu anupito Akuj anguna ka akijaanakin ka inges.</p>
<p>5. Nguna alunyar nguna ka akirionut</p> 	<p>Paaran sek ayenen akwap a Fiji alotooma ngimurok ka akinyam ngitunga. Etutubete ikes tari ngulu ecamito ikes akinyam ngakito anguna ka apeyo ngawati kec. Apedorito ngikarikok angimurok alosit anamoru anguna amwaka nait pa apedorito akinomo. Nait apotu nguna etiyaete ikes nu yaut ngilam loreria. Atwakete ngitunga pa eyenio ka pa apedorito ikes ayeneun anguna ainyo.</p>
<p>6. Eemut ngolo ke epeire</p>  	<p>Ayenen epeire anguna ka akidup ngikito ngulu erae ebangi, emira. Abu epeikone a ekarikon angolo arae ekeetic agyelanar ngikito todiakakin alowae angol. Abu inges tokurianiar ebe elosi inges atwanare. Apotu ikes kiirasi anguna ke ekelesiya kori ekanisa ka apotu yaasi inges kilipakinae. Aponi kitongaleunoe ka kipotok akekiyar neni a Yesu. Ngina eirariata ngitunga ngulu ke ere angol nguna apotu kitiyakin apotu ikes dang kiwuapakis Yesu. Apotu ikes togeut ayenun ebe kebu Satan tomodianak ikes. Apotu ikes tojongoto ngamuronisia daadang alore kec. Tari ekagyelanaran angikito abu toruwor ekristayayot ka abu tojongo agyelanar ngikito. Tokona araut 80% - 90% ngikristayon. Alakara ngikarikok ngulu ke ere nait pa etemokino ngun. Apotu ikes togeikis akiriamanakin anginataparac ngisaae 4:00 a.m. Apotu ikes kingita anguna ka akisioniyo ka kingitakis Akuj kikama atukot kec. Tokona ngitunga ngulu adiaakanakinosi anginapaki nyeringa ediakanakinosi. nyikito ngulu amam ngaraito alomut ngaraito ka ageu anam akilelebun ngikolya ngina paan sk ayakasi ngikolya ngulu akuduoko.</p>
<p>7. Akilocokinet alojara</p> 	<p>Aponi ngitunga ngulu ekatakinito akimasar apukan torocarae lojara. Arae akibois ngina amam akigyeno. Nait apotu ngikelesiyae kori ngikanisae togeut alosenene lojarae. Anageikinet agogong. Ayakatar ngitunga akimananu alotooma kec a eitakito anyangan. Pa atenito ikes akisyononokin. Nait abu Akuj tolom ka toruworos ngimabus ngikristayon. Tokona ipedori iyong akiirar ngitunga ilipete eosi ngieosio neni ka Akuj alojaara. Ani ilosi iyong itubi alojara eosi ebi lokanisiya.</p>
<p>8. Ngikibelekinioto nguna alalak</p>	<p>Alotaunio, apotu ngakibelekinioto nguna alalak totakanut. Apotu ngikelesiyae kori ngikanisae anginapaki tocunakinos anguna ka akilipanakin ngitaunio kec. Apotu ikes kingita akisioniyo anguna apotu ikes kitiyata aloyaitene kec make. Apotu ngitaunio kibelesinos. Paaran sek pa amaisianete ngitunga nait tokona emaisianete. Enyipun ngasecisia angakisianisia, akulyako,</p>

	<p>ngikelipanak a ngidwe alorukudei. Elosenete ngidwe losukulo. Epoloe amucurusoo, abongut ngikalotok.</p>
<p>9. Eemut keecere</p> 	<p>Alowae ke ece. Amam ngikolya ngikaru 55 anerae abu ekitoe ngolo ewuakinitae nakipi kinyasu ngakipi. Alowae angolo ka angolol, anam nginyomen. Apotu ngitunga ngulu ke ere daadang potu alimor ngasecisy kee nguna atapapaa kee ka akitimo anguna angimurok. Apotu ikes kingita Akuj kisyoni ikes. Alotooma ngirwa, aponenete ikes alokingaren Akuj igworosi. Abu nginitungan yau ngitorubei kee ngulu ka amuronot ka kicunyarae ikes. Alotooma ngun, abu Akuj kitangaleu ngakipi kee ka apotu ngikolya killelebun. Abu akwap ngina alokipetot angolol nabo tongaleu ka togeik akitolomun ngaraito nguna alalak</p>

Tosyoma kaapei 2 Ngakiro angirwa 7:14.

- Alurotin aponiata ngitunga (2 Ngakiro angirwa) tobongosi neni ka Akuj?
 - *Apotu ngikelesiyae kori ngikanisae kitiyata kaapei*
 - *Apotu ngikelesiyae kori ngikanisae togeut akilip kaapei*
 - *Apotu ngitunga togeikis akingita anguna ka akisioniyo anguna apotu ikes kitiyata ekau*
 - *Tocakasi ngiboro ngulu arucokina ka ngamuronisia*
- Anu abu Akuj kitiya ngina aponiata ikes kibelesinos neni Keng? Alurotin ngidi ngulu abunio Akuj kitererengio Fiji?
 - *Abu akwap kitolom ngaraito aneni sek amamukasi ngaraito*
 - *Abu anam toyakaunotor ngikolya*
 - *Abu akimuj ngina ka anam yaa akaoyan akilo ngina sek*
 - *Abu asekit angikesiak kinyipun*
 - *Apotu ngidwe ngulu aya lorukudei toloto losukulo*
 - *Apotu ngitunga togeikis amaisian*
 - *Apotu ngikalotok tobongut*
 - *Abu amucurusoo ka ngiboro toyakaun*

Abu Akuj kitagaleu akwap alorotin angulu ka akujuwanut.

- Epedori Akuj akitiya nu alotooma atukot kus a?
- Nyo icebore ngini ipedori iyong akitiya?

Atamatam

Yaa apaki atamatam alotooma ngiwaitin lu angipeipei

- Alipite itiyaa iyong anakisitiya ngiboro ngul?
- Nyo icebore ngini ipedori iyong akitiya?

Alotooma ngakitamatam ngadi ikilos aanyun akilo ngikisila ngulu ka Akuj. Angun, ikiyanyuni epite ngolo ikimodianakina Satan iwon ka ikatakinitor akiteyakaun iwon nakulyako.

Akitatamet 2: Oruworos ngikeyokok angisubuna

Ngatameta nguna apolok

1. Abu Akuj tolumok itungan an akipuka, akitiya etic ka akidarit ngisubuna. Erae na ayakaunor arucokina ngina iyookino ka ngisubuna.
Emaikina iwon esitiyaete amukeo yok eyokito ka epukato ngisubuna, meere akinyasinyas ka ikipukata ngisubuna.

Ngiboro ngulu iitana

1. Ngitorubei —2 kori 3, ngakadia nguna angisubuna eeniyanaritae (ngakadia 18/litana nguna eeniyanaritae kigurunoe ka atubutub)
2. Ngakadia ngadi nguna nyigirir
3. Ecwee angakipi
4. Araci ngina eninaarere ngakipi
5. Akaritas ngina apolon ngina igirio ayeunet

Akisileerekin

Nguna ke Ekariikon: Kiwuak ecwee angakipi nakibois ngina nyepedoriata ngakipi nguna eleleete alocwee amunaar idiobore nait torae neni epedoriata ngikasyomak aanyun nguna itiyasi anapaki angina ka akitatam. Toped ecwee kimiek ngakipi eleleete togeik nait iyong akitatam. kitete ngikasyomak nguna itiyasi.

Ani kelimu idio atemar aleleasi ngakipi alocwee, tolumok inges ebe emam neni ekokini ayong eretakini ngakipi. Toesik ngikasyomak tolumut ngidirotin ngulu epedor akitiyakin. Ani kemamu idio ngini epedori alimun ngadi kingit akingiset na “Eya ngadi ipedorete iyes akitiyakin a?”

EKIYAN ANATUKOT ANGINA ALALAN

- Anu nguna apotu kitiyakin?
- Anu ipotu iyes totamak alimuni ayong ebe “emam nguna apedori ayong akitiyakin” akiretakin ngakipi eleleete?
- Anu nguna arokot etakanunete erae pa kiretakin iwon ngakipi eleleete?
- Alipite epedorere iwon akitiya akibekekinet na?

Ikilimokinit iwon Akuj alokeya angulu esiaunak alo Baibul ebe kipukata – kori aruwor “ngikapolok” angisubuna keng. Anakitatamet ana. Ikiripikini iwon alimunet ngin ejok.


Eemut

Nguna ke Ekariikon: Tosyomak eemut lo lokasyomak

Erae ngitunga a India ngulu enyaritae Pokomchi ngikulyak anakwap angina a Guatemala. Ngikaru ngatomoniuni ngulu alunyarosi apotu Missionaries potu nakwap ngin akitatam evanjeli ka akiduk ekelesia kori ekanisa. Apotu ngipokomchi ngulu alalak kiiut Kristo nait apotu ngatuketa kec kidongo erae ngikulyak. Apotu ngikristayon ngulusorok ngulu apotu kibekekinos toyakaunotor akigyeno anguna amoi, nait amam akigyeno anguna ka akwap ana. Nguna akire edarito ikes atwanare bon anguna ka aesikinia acanaanut kec anakiyar alokwap ka alosit akiruk ka Yesu anakuj.

Apotu nu togeut akibelekin ngina alosio epasitait Arturo ngolo asorokona, abu kisyak akitiya alokiding ngipokomchi. Abu inges kisiak ka ngipasitae angipokomchi ngulu pa asiomito. Abu inges kisiak akitatam ikes ebaibul. Ani esiomete ikes abu kisileerek erot ngolo ecamitor Akuj iwon akiwuakin ngikisila ngulu eya tooma lobaibul nakiyar yok ngina anginakolongit.

Ationis ngina apetuna alokiding ngipokomchi arae ngidulae ngulu ingadao akimuj anapaki angina ka akilem. Alemununuyete ngiketak anginapaki akimuj ngina alalan. Ngimirio esiaunete akimuj eringa tari ngidwe nyiira. Abu Arturo kingit ngiketak tema: “ngae eos”, iyes kori ngimirio? Apotu ngiketak tokyenata temasi, “ngimirio” kingit Arturo “Ipukato iyes ngimirio kori ngimirio ipukato akiyar kus? Apotu ngiketak tocamut ebe ngimirio ikipukato isua ka ngikalya kosi. Apotu ikes tolemasi akimuj akimuj ka emam idio abu kiretak ikes. Ngimirio meere ngitunga apotu toseut nguna emaikina ngimirio kimuja. Angun abu Arturo tema eba Ebaibul ebe emaikina ngikilyok ka ngaberu kipukato ngisubuna. Abu kitatam ikes ebe abu Akuj kiterereng ikes ka amukeo anerae aponi tosubunae ikes anakikwaanet ka Akuj. Emaikina ikes kisitiyata amukeo angina abu Akuj inak ikes anguna ka akiwuapakinia akiciket angina ka akipukaa ngisubuna, meere aisikin ngisubuna ikipukata iyes.



Apotu ngipokomchi totyakut ebe itana ikes kitiyata lopite ngolo ke Ebaibul ka ageun akipuka ngimirio. Apotu ikes toduko ngidulae ngulu pa apedorete ngimirio Alomar nakimuj kec. Nginapei agoloriata ikes ngimirio anakimuj apotu toriamut akimuj ngina itemokino anguna angikalya kec.

EKIYAN ANATUKOT ANGINA ALALAN

- Anu apotu totakanut aloemut alo?
- Anu ikipedori iwon akisisaun aloemut alo? Alipite epedorotor nu akitiyakin anakwap yok?

Akisiom Ebaibul

EKIYAN ANATUKOT ANGINA ALALAN

Tosyoma Akisyakinet 1:26-28; Akisyakinet 2:15, Ngikirukisio 24:1.

- Neni angae icikakinitae akwap na? (Ngikirukisio 24)
- Anu abu Akuj tolimok itunganang anguna angisubuna Keng?
 - *Kipukata akwap*
 - *kitiyata etic*
 - *Kiyokito inges*
- Nyo apolou ka akiyokit inges? Nyaanu nguna ikitiyae iwon ikiyooki kori ikidarit idiobore? Alipite iyokiyere iwon ngisubuna ngulu ka Akuj?
 - *Ani ikidarit iwon idiobore, ikiuriari inges ka oyenunito ebe emam nyinyasunio kori nyemunario. Akitoodikinet, ikipedori akitiya nu anakicak ngiboro cari cari kori acamakin ngiboro lu kinyasunae. Emaikina iwon ka acoikinit eteete ngiboro ngulu ikote akiyep ngamoni nguna elakakinete akalele iwoki ngalup nguna etarako.*
- Nyo apolou ka akitiya etic? Alipite itiyaere iwon nguna?
 - *Ani ikitiyae iwon nguna Keng – ikiinakini Inges kitolom idiobore. Emaikina ngisubuna ikiinakis iwon akimuj, akisibus ka ainakin iwon ngakiitaniata ngace. Akitoodikinet, ngiboro ngulu edukere. Ani ikitae iwon, ikitiyae nguna ka Akuj nguna abu Inges ikicikak iwon akitiya. Emaikina iwon olakara ikitae anerae ikiwuapit ngakiciket nguna ka Akuj.*
- Nyo apolou ka akipuka ngisubuna? (Totamutu eemut ngolo angipokomchi)

- *Apolou ka akipuka erae akitere idiobore. Akitoodikinet ke ecwee angakipi, ikipedori iwón akiretakin aore angakipi – nyepedori akiretakin iwón. Emaikina iwón esitiyata amukeo yok akipukaa ngisubuna. Akitoodikinet, ipukae edaraca ngisubuna. Kemam edaraca epedori angolol aseun neni ikilosí iwón ke edaraca kori ka atuba epedori angolol aseun neni ikilosí iwón. Meere acamit ngina ka akuj atemar ayakaunotor iwón ebi ikipukata iwón ngisubuna. Ikiitanit iwón engita Akuj kituruba ainakin iwón ngirotin ngulu ka amukyanut ngulu ipukaare iwón ngisubuna.*

Ngina ipukaare, itiyaere ka idaritere iwón ngisubuna, ikiwuapit iwón ngakiciket nguna ka Akuj. Ikinyarito iwón nu ayakaunor arucokina ngina iyookino ka ngisubuna. Nguna pa eyookino anguna ka aesecit, apotu nu togogongioto nooi akilo nginasek abunio Akuj ekingaren inakinia ngakiciket nu eringa Inges ecamit iwón akiwuapakin ikes.

Arucokina ngina iyookino ka ngisubuna

EKIYAN ANATUKOT ANGINA CICI (Ngatuketa 2-3)

Nguna ke ekarikon: *Inak ngologurup aenet ngina angakaritasia angisubuna alotorubei ka ngakaritasia ngadi nguna nyigirir.*

Toripikisi ngolotorube anakad. Kitoropikisi alopite angolo eyakatar erae kitoodiunito ikes arucokina ngina iyookino alosubuna kori emam. Angun, ikisitiyae ngakadia nguna nyigirir aramakin ngakitodianakineta ngace nguna angatuketa kec angipepei.

AYAUN NGUNA AMORA IKES NATUKOT

EKIYAN ANATUKOT ANGINA ALALAN




Nguna ke Ekarikon: *Nginapaki irikaginiata ikes akimor anatumeta, toripik ngakadia angapepei.*

- Ikisitiyae iwón nu anatumeta yok a?
- Anguna angakadia anguna ajokak, emaikina iwón etiyata nu akilo a?
- Anguna angakadia anguna aronok, emaikina iwón ojongoto akitiya nu a?
- Alipite ikipedoria iwón akibelesinua nu?




Ngatameta angiticisio angulu ka amina

Oseutu ngatameta 2-3 ka otamutu epite ngolo epedorere iwón akitiya ngiticisio lu ngulu ka Amina.

Ngakadia angisubuna

Akiyok ngityang 	Ngakipi nguna asegak 	Akitare akimuj 
☺ Ikilimokini iwón akiyok ngityang. litana iwón adukokin akibois ngina ajokan anguna	☺ Adukun ngacumae ka akisitiya ngakarei, akikula ngakipi kori akimadakin	☺ litana iwón etaete akimuj anguna ka akiitanio yok. Erae lo epeirot ngolo ka akitiyae nalup.

kec. Ikotere nyekoruniata ngidekesio local. Erae lop epei alorotin angulu ipukatare iwon ngisubuna.	nakolong, ingarakinete nu ngakipi tosegak anguna angawati yok amasia ikotere nyediakakinere	Ejok imana ngini keejikon anguna ke ekal ariamunia akimuj ngina eduki ngawati
Akitare 	Akiduk akai 	Ecoron 
☺ litana iwon akitare ngalup nguna abu Akuj ikiinak iwon. Emaikina ngalup nu ikiinakis iwon akimuj anguna angikalya yok meere toruwor ikes ikidarit iwon. litana iwon akiwuakin ngakipi nguna icwaicwayo ka ngirotin ngice ngulu eruworotor ngalup nguna etarako ikotere itolomunete ngikinyom ejok.	☺ Ikiitanit iwonn etolim anakolong ka anakiru. Ayenunit ebe eyakare iwon akai nginaperot ngina ajokan. Erae lo erot epei ngolo kipukaet ngisubuna. Nyinga iwon erae akolong kori akiru ikipukato.	☺ Inyipunete ngicoronin ngidekesio ka itojokunete akibois yok toseg. litana iwon eyokiyete akibois yok ka aripikinit ebe nyengoriaka ikotere ngidekesio.
Akicok ngikolya 	Akitub ngikito 	Ngalocio anglimrio 
☺ Erae akicok ngikolia ecerot ngolo eriamunere iwon akimuj anguna ke ekal.	☺ litana iwon ocoikinito ebe ani ikitubi ngikito emaikina jwi jwi odupete ngulu kitete. Erae ngikito ainakinet aneni ka Akuj ngulu iretakinete ngalup nyeleleasi. Ani ketubio iwon ngikito ka pa kisitiyao ngalup eruwor nu adeudeu ngina emam idiobore elomuni.	☺ Epedori aloc ngina angimrio angulu enyamete akimuj yok akingarakin akinyipun ngimrio. Meere ngalocio nguna egogong akitiyaun. Epedor ikes akitiyaun angabambui, angatetelei alowaitin anguluce ikwa ngulu alotorube. litana iwon epukato ngisubuna ka nyemaikina ngimrio ikipukata iwon.
Akikam ngicuc 	Akirap akimuj alocwe 	Akipper tooma nanet 

<p>☺ Erae akikam ngicuc ecerot ngolo kinyipunet ngicuc. Ikilimokinitae iwon akipukat ngisubuna ka akinyipun etyae angicuc erae ecerot ngolo ikipedoria iwon akitiya nu.</p>	<p>☺ litana iwon euriarito ngikalya yok alodekesio angulu erae ngicuc eyaunito anarapit akimuj yok.</p>	<p>☺ Ikingarakini akiper nanet nyeriamunere iwon malaria kori ngidekesio ngice ngulu eyakatar ngicuc.</p>
<p>Akicak ngiboro ngulu engorlaka/ngaraclo</p> 	<p>Aonite/ngalup nguna nyitlyao</p> 	<p>Akibok ngakarei</p> 
<p>☺ Abu Akuj ikingitak iwon akidarit neni iboiyere iwon. Apolou ebe emaikina iwon esibusito anguna ka akipuror Akuj. Nyemaikina iwon ocakanarete ngaraco, ngalejikoi, ngidoodoin, ngakapeerae ngikopoi ngulu erae ngapirae ka ngasaani cari cari nait kiwuakisi nakipany kori neni esubakinitae sek.</p>	<p>☺ Emaikina iwon oriamutu ngirotin ngulu kibelesinet ngalup nguna pepe kori aonite ikotere epedorio akitiya nabo alorotin angulu ka akicwaicwa kori ebolea ikwa aoret ka nginya.</p>	<p>☺ Erae ngakarei erot ngolo eriamunere iwon ngakipi nguna ikiinak Akuj iwon nguna eya kwap. Epedorete ngakipi nguna eya nakarei akitesegunia ka eyakare iwon ikingalee.</p>
<p>Akidup ngidyas</p> 	<p>Ngitiang alotooma akal</p> 	<p>Ngimirio enyamete akimuj</p> 
<p>☺ Akidup ngidyas erae ecerot ngolo epedorere iwon akingarakinia ngikalya yok.</p>	<p>☺ Nyemaikina ngitiang toapiyete anakimuj yok. Eyaunete ikes ngidekesio. litana iwon eyokiyete ngityang ka adukokinit anok.</p>	<p>☺ Ekorete ngimirio edeke ka imujete akimuj yok ngina ikiitanit iwon. litana iwon euriarito ngimirio anakimuj yok anakisitiya ngalocio, ngamitegoi anguna ka akinyipunio etiae angimirio aloreria yok.</p>

Aburor

EKIYAN ANATUKOT ANGINA ALALAN

Eya ngiboro ngiarei ngulu ikilimokint iwon abuk ngina ka Akisyakinet akitiya anguna ka akiwuapakinia ka akidarit ngisubuna Keng.

1. Akiyokit ikes
2. Akitiya tooma keng
3. Akipuka ikes

Erae na apolou ngina ka ayakar akiyookinet anarucokina ka ngisubuna. Anerae ikisubunitae iwon anakikwaanet ka Akuj. Ikipedori iwon akisitiya amukeo yok akiyokiyo ngisubuna. Ikipedori iwon dang akingit Akuj ainakin iwon ngatameta ka aosou ngina iitanitae iwon.

Atamatam

Nyaali erot ngolo kitete ngolo ipedoria iyong akidaria ka akipukaa ngisubuna ka Akuj anatukot kus alotooma esabit ngolo ebunit?

Akitatamet 3: Epedorio iwon akibelekin nguna amoi

Ngatameta nguna apolok

1. Pa ayakatar Akuj anguna atemar nyikibelekin iwon. Eyakatar inges apolou ngina ka akiyar yok, ecamit inges iwon opoloutu ka tojoku akiyar yok.
2. Ikipedori iwon aruuwor ngitunga ngulu ikiyauni akibelekinet anguna anguluce (ikwa Yesu ka aberu a Lee). Tari ipeitunganan ngini abu kiwuapak ka anupit a Akuj apedori alakun etaun daadang anakinyasuno.

Ngiboro ngulu iitana


1. Ngitorubei —Etorube ke ekal angolo akulyakana
2. Ngitorubei —Ngakadia a Yesu ka akinuk ikatwan – ngakadia 8.
3. Ngitorubei —Ngakadia nguna ka aberu a Lee – ngakadia 3

Akisileerekinet

EKIYAN ANATUKOT ANGINA ALALAN

Nguna ke Ekarikon: Kitoodiya etorube ke ekal – ngican ka kingit ngikasiomak:

- Itamete iyes atemar ebelekin ekal lo alotooma ngilapio 6 ngulu alunyar a?
- Itameta iyes atemar ebelekin ekal lo alotooma ekaru epei ngolo alunyar a?
- Itamete iyes atemar ibelekin ekal lo alotooma elap ngolo ebuni a?
- Itamete iyes atemar ibelekin ekal lo alotooma ngikaru 6 ngulu epote a?
- Itamete iyes atemar ibelekin ekal lo alotooma ekaru ngolo ebuni a?



Ani kebongokis ikes atemar EMAM nakingiseta daadang, angun, kingit anguna ainyo? Ani kebongokis atemar ee kingit atemar epedor akibelekin na ikwaani?

Tosyom nabo ngingaeta alotooma akitatamet ngina kaapei – Ngikisila 28:1-14.

- Alurotin ecamitor Akuj akiterereng iwon?
- Iwuakin ngingaeta lu lokal lo alotorube alo a? Anguna ainyo? Kori anguna ainyo emamukar?

Tosyoma Yeremia 29:11

- Alurotin angayeununueta eyakatar Akuj anguna ka akiyar yok?
- Kepedorito ngingaeta lu akiwuakino lokal lo alotorube alo a? Anguna ainyo kori anguna ainyo emamukatar?

EKIYAN ANATUKOT ANGINA ALALAN

Toramakisi ecetorube ngolo ke ekal alo ikwa ecamakinitor Akuj ikes toyakatar.

Akitegelaan

EKIYAN ANATUKOT ANGINA ALALAN

Nguna ke Ekarikon: *Erae ngalimununuyeta nguna igirir kwap ngun nguna epetuna irworoe – Icamit iyong aseun ngalimununuyeta nguna irworotor ngitunga anakwap kus.*

“Eruwor ikoku ke erwosit,” eruwor ikoku angina ilipana (Monk) ekelipan”.

“Eyakatar angolol ngapakyo nguna edidingia ka ngapakyo nguna elolomia, ikoni neni akiyar angitunga”. “Etiono eriamune akimuj ngina itemokino, nait epatana aruwor ekabaran”.

- Nyo apolou angalimununuyeta anu?
- Iyeni iyong ngadilimunet nguna ikote nu nguna eyakatar apolou ngina ikwaan a?
- Anu analimunet anu icamunit iyong?
- Anu analimunet erae keyai adio, iyookino lopite ke Ebaibul?

Yeremia 5:1

- Ngiyai ngitunga ngulu ewarit Akuj?
- Anu etakanunete erae keriamu Inges itunganan ngin?

Ezekiel 22:30

- Ngiyai ngitunga ngulu iwarit Akuj?
- Anu elosete atakanun erae keriamu Inges itunganan ngin?
- Anu elosete atakanun erae pa keriamu Inges itunganan ngin?

Alopite angolo ke Ebaibul tari ipeitunganan ngin ikinyomit ka kiwuapite Akuj alakun etaun anakinyasuno.

Arakau itunganan ngini iyauni akibelekinet

EKIYAN ANATUKOT ANGINA ALALAN

Tosyoma Luka 7:11-17

Abu eemut lo toyakaun nginapaki eryameta Yesu ka ngikewuapak Keng ka apuserut nanukio ngina alokoku keng apaki ngina atuborotor ikes alopuke angolo ke etaun. Alakara ngikewuapak a Yesu anerae aringa ikes eanyunito akujuwanut. Egworosi apuserut ka ngitunga ngulu arukitotor inges.

- Anu apotu totakanut aloemut alo?

Nguna ke Ekarikon: *Kisitiya ngakadia 8 nguna a Yesu ka akinuk ikatwan alotorubei aburoria ngiboro ngulu 8 lu, ikipedori iwon akisisaun aloemut alo nguna aitunganan angina eyauni akibelekinet.*

Eya ngakiro 8 nguna abu Yesu kitiya aruwor itunganan ngini eyauni akibelekinet: Oanyutu anu nguna.

1. **Abu Yesu kingolek inges.** Aya ngitunga ngulu alalak nasepic, alakara ngikewuapak a yesu anguna ka akujuwanut angina aringa ikes eanyunito – kikote neni dang, abu Yesu toanyu inges alokiding asepic. Ani kikilosu iwon aruwor ngitunga ngulu ikiyauni akibelekinet, iitana iwon aruwor ngitunga ngulu ikiyanyu ngulu. Iitana iwon oanyutu kire ebe ikiyanyuni ngitunga angipepei meere asepic.
2. **“Abu etau Keng tolot neni keng.”** Ani kikicamit iwon ayaun akibelekinet iitana iwon ayakaunor akisionit. Iitana iwon oraka ngitunga ngulu eriangakin ngitai ngina ikiyanyunia akiitanit angulucetunga. Ngapakyo nguna alalak ikijongoe iwon aanyun ka amitakinit. Nyaanu nguna ikitiyae iwon ikiyanyuni idio ngini iitanit anatukot yok? Nyaanu nguna ikitiyae iwon ikiyanyuni toto ngina abu lokile keng toesik akal kori papaa ngolo aponi toesikinae idarit ngidew ngulu cicik? Eyakare iwon amitakinit a? Kingita Akuj ikiinak iwon amina ngina alalan anguna ka atukot yok. Kingita Akuj ikitoodik iyes ngitunga ngulu ka atukot kus lopite ngolo iteo inges.
3. **Abu Inges inaki ngakiro nguna ka atitinyikin.** Iitanito anginapaki ngitunga idio ngini emitakinit anguna kec ka akisimukekin ikes. Epatana atamakin ebe ikiitanit ngiboro kire akingarakinia ngitunga

nait ngulu anginapaki iitanito akingarakino, nyepatana ariamun idio ngini ebuni akimaima ka akititinyikin.

4. **Abu Yesu totap alyel.** Ngina etiyaa Yesu nu, abu kitiya nguna pa eyookino alotalyo kec. Anupito ngiyudayan ebe nyemakina iyong totap alyel kori iruwor ngini nyiseg. Acamit Yesu aruwor ngini nyeseg anguna ka akingarakinia idio. Iitana iwon acamun akitiya nguna nyiyookino nguna ecamunito ikes alotalyo ka akitongoriano akingarakinia ngitunga. epedorete ngitunga akirworor iwon kori ikitepega nait iitana iwon akitiya nguna ikinyaritor iwon Akuj akitiya.
5. **Eyai apedor nakirok ngina ka Akuj ka nakilip.** Ngina elipia Yesu abu itunganan toyaru alokatwak. nyikimuriak akilip alotooma eyakae ngolo iyakar iyong. Yaa apaki akilipakin ngitunga. kitiya ngun inupit ebe kire ibelekini eyakae ka amitakinit anguna angakiitaniata adaadang. Kitatam ngitunga akilip ikotere epedoriata ikes dang ayenun apedor ngina ka Akuj.
6. **Apotu kitiyakin.** Aponi kiteyarunae esorokit anatwanare. Emaikina iwon oyakaunotor nguna itiyakin alotic yok. Ani kicamit iyong akingarakin, togeik angiboro angulu edisiak angulu ipedorit iyong akitiya epataka. Ani kipedo iyong akitiya, elakarosi ngitunga ka ecamunete ngulu alalak akimorikin akitiya ngun. Anadaunet ipedori iyong akitiya ngiboro ngulu agogongok akilo.
7. **Abu Yesu kinyakak ikoku neni atoto keng ka torotok.** Arae toto itunganan ngini etopolooritae, ayakatar inges akisuudaet ngina ka apedor ka Akuj akimor kaapei ka nguluce. Ngina ikingarakinia iwon ngitunga, iitana iwon akiteyenun ejok ebe nyemaikina ikitojoki ka toruwor iyong ikituruunio. Kimiek ngitunga kisileereut ngun elimonokinete nguluce anguna apotu totakanut. Edukokini inges akeroru kec, akilo iyong ikituruun. Abu Yesu torotok oesik ikes irworosi eemut kec.
8. **Aponi kituruunoe Akuj.** Anadaunet emaikina akituuruun tobongo neni ka Akuj. Kiteyenu ejok jwi jwi ebe ngina edaunotor nguna daadang, Akuj Inges ngolo ituruunio.

Nguna ke Ekarikon: Toburosi ngiemuto ka aberu aLee – alotooma atutubet 1.

Erae aberu aLee aberu ngina akire ngina ayai nakwap ngina ka Asia. Eitanit inges nooi akingaranakin ngikalya ngulu akulyakaka alotooma atukot, nooi ngulu amamete ngiticisio. Abu inges togeu akipeyonokin ngikalya lu ngidi angololap iwarit ngirotin ngulu kingarakinet ikes toriamuniata akiyar. Eya nege ngiemuto ngiuni alokiding nguluce ngulu alalak ngulu abunio inges topedoria akingarakin ngikalya.

Erae ngiemuto lu ngulu akire

Eemut 1 – Aberu aLee ka ngatur

Anakwap kec, ayai akal ngolo akulyakana ngolo ayakatar ngidwe ngiarei. Amamukatar papa ka toto etic. Abu aberu aLee ilat torii lokal kec toanyu atutubet adioci ngina angalup anguna aya kingaren ere kec. Abu inges kingit “nyo pa idupakiniata iyes ngatur ngadii ne. Ipedorete iyes akisibus ere kus ka agyelanar dang ngace alomaket angolo eapi.”

Abu toto ke akal alo kitiya ngunapei ka abu togeu aayenen ngatur nguna abu inges todupak lomaket ngolo aapei agyelanar, nait atipei abu inges toanyu ebe engitasi ngikagyelak ngatur aecerangi, nait ayakatar inges ngalu nguna ekuduoko nguna pa apedori inges adupakin ngace neni. Kikote neni dang abu toto na togeik agyelunun ngacetur alokagyelanarak anguluce ido togyelana kaapei ka nguna keng. “Apedori ayong agyelanar ngiboro nguluce dang”. Abu inges togeik akenyunun taparac nooi todilok agyelunun emototo ka ekokonat anguna ka angyelanaria kaapei ka ngatur alomaket.



Eemut 2 – Aberu aLee ka ngarungeto


Ekal ece ngolo eitanit akingarakino acamit etic nait pa ayeni nguna kitiya ka amamukatar aosou ngina ke etic. Amam pa etiyaete ikes jwi jwi ikwa ngiketiyak nait ariamununuyete ediotic. Abu aberu aLee toanyu ebe erae akal lo ngolo amukyaana ka kire eitanito etic. Angun abu inges tolot akipeyokin ekal ece alokanisa ngolo arae eketan angarungeto. Abu inges kingit ikes erae keyai epoida nakitare ngarungeto. Ngina eiraria inges atemar erae etic ngol ngolo ajokan, abu inges tolimok ekal ngol tema – ikinyarit iwon Akuj aminakinit ngikidunyet yok ka akidarit ngulu angican.



Abu inges kingitak ikes erae kepedorete akitatam ekal ngolo akukyakana aruwor ngiketak angarungeto. Apotu ikes tocamut. Abu aberu aLee kisiriamiriam ngikalya nguluyaarei lu anguna ka ayenun. Abu ekal ngolo akulyakana tolakar temasi ebe epedorio tokona ikes akitiya idiobore ka apotu atipei toloto akipangaun amana adio ngina adit ka ngiboro daadang ngulu eitanito anguna ka ageunia. Kelunyar ekaru apotu ikes toriamut ngarungeto nguna alalak, apotu topedosi dang akitac ngisilinga ngulu epangauniata ngalup ka ngisilinga angikinyom ka nguluce dang ka toyakaunotor epoida dang anguna kec.

Eemut 3 –Aberu aLee ka akisisil ekal

Ekal ngolo angiuni ngolo acamit aberu aLee akingarakin arae ngolo abu totyakar alokaurunak kec. Apotu ngikaurunak lu temasi emam ajokis ayakatar ekal lo ka emam epoida edio eyaunete. Abu aberu aLee kiriamakin ke ekal akikatakinia akisisil ngikalia nguluyaarei. Abu aberu aLee tocamak akiriamakin ke ekal anginapaki ka akingarakin ikes tosubakis eyare kec ejok erae kecamunete ngikaurunak kec akinyakar ikes nabo anguna ka akingarakinia. Alotooma nu apotu ngikaurunak tocamut akikinyom lokoku kec ka ekal keng nabo. Apotu tocamut akidenikin ikes ngisilinga ngidi ikotere egeuniata akirar ngasuwa nguna ngorok agyelantar. Abu edia togeu agelunun ngasuwa nu togyela nabo lodukanin angulu elosete asubanakinia anakikulare ikotere itiyaunere nabo ngiceboro. Epedorit tokona inges akingarakin ekal keng nabo, elakara inges anguna abunio toriam ngisilinga akitania ekal keng ka eyai tokona inges ka akeroru ikwa itunganan.



EKIYAN ANATUKOT ANGINA ALALAN

- Alipite eyaunitor aberu aLee akibelekinet natukot keng?
- Iyakatar iyong arereng ngina ekoni ngina ka aberu aLee anatukot kus a? Nyaanu nguna ibu iyong kitiya?
- Alurotin abunio aberu aLee kitiyaa ngidiboro anguna ka aruworor itunganan ngini eyauni akibelekinet ikwa etiyaa Yesu naberu ngina atwanit lokoku keng?
 - *Abu inges toanyu ngitunga. Abu inges toseu ngikalya ka togeu akipeyokin ikes.*
 - *Abu inges toyakaunor akisioniyo ananeni kec. Ayakatar inges ekibure akingarakin ikes.*
 - *Abu inges kisimukek ikes.*
 - *Ijaari inges nguna nyepataka ka ecamit akitiya ka agogong. Meere inges ngina isimukekini ngitunga bon nait iwaruni ngirotin ngulu kingarakinet ikes.*
 - *Tari pa kelimunito ngiemuto nu, toyenete ebe kire abu inges kilip.*
 - *Apotu kitiyakin*
 - *Abu inges toesik ngitunga toropasi. Ikes meere inges, ikes ngulu apotu kitiyata alomaket kitata ngalup.*

- *Aponi kiturunoe Akuj. Nyelimuno nu daadang aloemuto nait apotu ngitunga ngidi toruworos ngikristayon.*
- Anu kitatameta epedorio iwon akisiaun aneni ka aberu aLee?
Nguna ke Ekarikon: *Kedau ainakin ngakingiseta ngadi toburosi ngakiro nu:*

Ngakitatameta nguna ikipedori iwon akisisaun aneni ka aberu aLee:

- litana iwon ayakaunor ngitunga ngulu eyakatar ngitai ngulu ecamito akingarakin ka ainakina akijal apaki akitiyaa ngun.
- litana iwon Akiya apaki adukun erukitene ka ngitunga alotooma atukot yok ngulu iitanito akingarakino. litana iwon akipeyonokin jwijwi adukunio akikinyoma ka ngitunga.
- litana iwon akiiranar ngitunga. Ecamito ngitunga ngulu alalak ngulu eya natiokisio toyakas ngitunga ngulu imaimayete ka eminas ikes. Ani keanyut ikes atemar emitakinetae ikes angun elosete ikes akilo akiirar nguna ka akimaimauno. Emaikina iwon oyenunito ejok ebe nyemaikina iwon oyakatar ngitai ngulu ka atubonokin ikes, nyecamunete ikes akimor ka iwon ngatiokisyo kec, nait ngitai kire jik ngulu ecamito akingarakin. Ani keanyut ngitunga atemar itubonokini iyong ikes nyecamunete akimor ka iyong nguna eyakatar ikes.
- litana iwon ayaun ngatameta nguna ingarakinete ngitunga aanyun ngirotin ngulu kitete ngulu epedoriat ikes akitiyaa ngiboro. Nyeyenete ngitunga anginapaki epite ngolo kibebelekinet akiyar kec. Etamakinito ngikulyak anginapaki atemar nyillocokinete ikes eyakae keck a epatana ikes ajamakin eyakae toriamut akiyar ace. litana ikes idio ngini einakina akitiya kaapei ka ikes ka inak ikes ngatameta anguna elosete ikes akitiya akibebelekinio akecekiyar.
- litana iwon ainakina lotic anguna ka akisiyookinio ngatameta. Abu aberu aLee togyelu ngikinyom ke ekingaren, abu togeu adupakin ikes ka aberu. Nyelimokina inges ikongina nguna emaikina kitiyae. Abu inges toriam idio ngini emaikina akitatam ekal epite ngolo edupere ngarungeto ka kingarak ikes ariamun emanikor ngolo epedorete ikes akisitiya. Aloemut angolo angiuni abu inges tolot lokal acamun ka ikes. Nyelimokina inges ngitunga nguna kitiya, abu inges torucokin ka ikes anguna ka akingarakin togeuniata.
- Toinakina ka acमित ageun anguna ekuduoko. Meere ngatameta daadang eyaunete akibebelekinet ngina apolon ikwa nguna ke eemut alo. Emaikina iwon ngacepakio etiyata anadoket ka anadoket ka anakolongit ka anakolongit akingarakinia ngitunga. Nyitamakinit atemar epedorete ngitunga ngitunga daadang atipei akibebelekin. Inaki ikes adoketait ngina esyaunan ngina epatana ngina pei irikiniata ngitunga ejok nguna edisiak ecamakinete ka ainakina akikatakin nguna apolok akilo ngun.
- Eyaii akibebelekinet apaki. Apotu ngiemuto lu totakanut alotooma ngapakyo.

Atukot ngina engarakinan

Ngacepakyo egogong atamun ngadikiro nguna kingarakinet ngitunga. Epeiro ngolo ipedorio ayakaunor ngatameta akilo erae ageun akingarakin atukot. Epedor lo aruwor atupok a ngitunga angulu ecunanakinosi kaapei alotooma esabit anerae eyakatar ikes acमित akingarakin ngitunga. Epedorete ikes kilip kaapei anguna angitunga angulu ingarakinete ikes angipeipei ka angun tomora ngolowae daadang alotooma ngatameta nguna ecamito ikes akingarakinia anguna ka ayaunia akilocokinet. Epedorio atukot kaapei atamun ngakiro nguna alalak akilo nguna epedorio ipeitunganan. Nyikimuriak akingit Akuj ainakin iyong aosou.

EKIYAN ANATUKOT ANGINA CICI

Totamunito etorube ngolo ke ekal nginapei anakisyakinet akitatamet. Totamunito ngirotin ngulu ikipedoria iwon akingarakinia ikes kibebelekinos alotooma eyakae kec ngolo atokona tari lotorube ngolo ecamakinitor Akuj ikes toyakatar anakiyar kec.

Agolokinet

EKIYAN ANATUKOT ANGINA ALALAN

Tosyoma Ngikirukisio 139:14-17

Epatana ngacepakyo akinup ebe nguna yok nguna alunyar ikes eyeunete akiyar yok ngina amoi. Ani kikiurunitae iwon erae ngikulyak erubakinio iwon erae ngikulyak, ani kerae ngikalya yok ngiketak angun ikirauni iwon dang ngiketak. kikote neni dang, eyakatar Akuj ayeunet anguna ka akiyar yok. Ikisubunitae iyong igelaana ka ikiinakinit Akuj ngainakineta ka ngipitesyo ngulu ecamitor Inges iyong ayakaunor ka ikiwuak iyong lokal ngolo acamitor ikidoun. Ecamit Inges iyong kisitiya nguna ikiinak Inges iyong ayaunia akibelekinet. Ipedorete iyes daadang angipepei ayaun akilocokinet nginationis daadang iyakaunor iyong, kerae alotooma akal kon, kaapei ka ngitunga ngulu, kori anguna ka atukot kus. Epedori Akuj anyarare iyong ayaun akibelekinet lokelesiya kori lokanisa kus, lodaosis tari nakwap kus – Uganda.

Totamatama ka kiwuakis lotic

Totamatama ka kilipa anguna angakingiseta anu:

- Ikoni akiyar kon ai? Inupit iyong atemar epedori Akuj akibelekin akiyar kon a? Kilip ikotere ikitoodik Akuj iyong epite ngolo ibelekinio iyong akiyar kon ngina amoi.
- Yaa adiopaki totama idiotunganan ngini ipedori iyong ageun akingarakin. Icamit iyong aruwor ipei anatukkot ana angina engarakinan a?

Nguna ke Ekarikon: Ngina eyakaunor atukot apaki ngina ilipiata, kingitak ngulu ecamito aruwor ngulu ka atukot angina engarakinanan akiriamakin ka iyong anapaki angina ka akiengun. Kingarak ikes totykatyakas angatuketa anguna edolito ngitunga 4 – 8 ka kisimukek ikes ayeun apaki ngina iriamakinotor. Kisileerek anakiriamakinet kec angina ke ekingarne ebe emaikina ikes daadang toseut idiotunganan ngini ecamito ikes akingarakin. Togeutu anakipeyonokin ngitunga ngulu. Kilipakinos make ebe kingarak Akuj ikes ilosete iyes akipeyokin. Anakiriamakin angina angaarei yaasi eripot alopote angolo alosio apeyo ka tomora ngolowae daadang ngolo icamito iyes anatameta kingarakinere. Ikwa egurup, kingita Akuj anguna ka aosu ka kisitiyata amukeo ngina ikiinit Inges iyes atamunia ngirotin ngulu epedorere akingarakinia, nyikatakis akitiya ngiboro daadang kaapei toseutu epeiwa ngolo edit ageunia akingarakinia.

Akitatamet 4: Ikiinakinit Akuj iwon nguna alalak

Ngatameta nguna apolok

1. Ayenun daadang nguna ikiinakinit iwon Akuj
2. Ngiboro ngulu eya tooma ngulu ka akuwan ka ngulu ke etau

Ngiboro ngulu iitana

1. Akigiret ngina ka abolya
2. Ngitorubei angakadia angiboro – etubutubutoe 2 -3 (ngakadia 24 eenen)

Akisileerekinet

EKIYAN ANATUKOT ANGINA ALALAN – EEMUT AITUNGANAN ALOTOOMA NGINGAETA

Nguna ke Ekarikon: Eringa nyigitakina ipei akisiom eemut ngolo etupakini.

Ayai ekanupan nakilip keng bon ka abu tossyom alotooma Mateo 25: angun, abu tolim tema:

“Kerae oruwor ayong ikwa eketiyan ngolo aponi inakinae ngainakineta ngakan ketiya ayong ngakiro nguna apolok neni ka Akuj! Nait ekesionit ayong eketiyan ngolo aponi inakinae apei – atami ayong agoit Ekapoln nooi anguna keng! Ejok, nyerae angun, nguna kang anerae nyatamakinit ayong atemar ayakatar ayong adio inakinet kori ngainakineta nguna apolok akijaanakinia Akuj ka akitiya anguna Keng! Alotooma ngun, akulyakana ayong nooi!!! Nguna etakanete kire aneni kang emam nyapedori ayong akingarakin idiotungan anerae ayakatar ayong elope ngakiitaniata nguna alalak. Okoe Ekapolon, kingarakinae ayong inakinae ayong ngainakineta ngadi esitiya ...”

- Anu ibu iyong toanyu anabolya?
- Anu abu ekanupan ngolo akulyakana tolim?
- Iyookino inges anatakakinit keng a?
- Anguna ainyo atamia inges alopote alo?

Akisiom Ebaibul

EKIYAN ANATUKOT ANGINA CICI

Tosyoma Mateo 25:14-30

Ngingaeta 16-18

- Anu apotu ngiketiyak kitiyata angainakineta kec?
- Ipedori iyong atiakun angolo abu kisitiya ngainakineta kori angolo abu kiwu a?

Ngigaeta 19-23

- Anu abu ekapolon kitiya ebonguni inges?
- Anu abu inges tolimok ngulu apotu kiyatakis ngainakineta kec?

Ngingaeta 24-28

- Nyaani ationis ngina ke eketiyan angolo abu kiwua ecwee keng?
- Anu abu ekapolon tolimok inges
- Nyaanu nguna itami iyong nyisitiyaata ngikanupak ngainakineta kec?
- Anu ikipedori iwon akiya a?

KINYAKUTU NU NATUKOT

Alimunun ngatamanakinet yok nguna alunyar

ETIC ANATUKOT ANGINA ALALAN - ABOLYA

Nguna ke Ekarikon: Kingitak ngitunga ngikan (5) potu ngaren. Inaki ngitunganan tosyom ngakitukuruwonereta nguna nyepedoritor akitiya nguna emaikina.

Itunganan ngini emojongit = “Okoe kerae ca oringa ayong arae esorokit, kayakatar agogong ngina kijaakinet Ekapolon angainakineta kang. Amojong ayong tokona ka akadou.”

Itunganan ngini esorokona = “Okoe kerae omojongite ayong, kayakatar ayong apedor ngina riket ngitunga, akijaanakinia Ekapolon angainakineta kang. Egegong natokona anerae asorokona ayong.”

Itunganan nginimucurus = “Okoe kerae oyakatar ayong apaki ngina iyatakina. Atingiyara ayong alotic kang ka amamukatar ayong apaki ngina kingarakinet nguluce.”

Itunganan ngini nyesiomit = “Okoe kerae osiomite ayong. Nyayeni ayong ngadikiro nguna etapito Ebaibul. Erae epasitait kori epaderit kire epedori akingarakin nguluce anerae elosit inges losukul ngolo esiomere ka itatamere Ebaibul.”

Itunganan ngini ekulyakana = “Okoe kerae oyakatar ayong ngisilinga ngulu alalak, angun, kapedorit ayong akijaanakin Ekapolon. Akulyakana ayong tokona akingarakin idiotunganan tari ayong elope.”

EKIYAN ANATUKOT ANGINA CICI

- Anu alotooma ngakitukuruworeta nu isitiya iyong?
- Anu alotooma ngakitukuruworeta nu iranari iyong aneni anguluce alokelesiya kori alokanisa?
- Ani kitukuruworet abu eketiyan ngolo abu kiwua ecwee keng?
- Acamakinit ekapolon akitukuruworet keng a?
- Itamakinit iyong atemar ecamakinit Akuj ngakitukuruworet yok a?
- Anu ikipedori iwon akitiya akilounia ngakitukuruworet nu?

litana iwon ageun aanyun nguna daadang ikiinak iwon Akuj

EKIYAN ANATUKOT ANGINA ALALAN

Anginapaki ikipupi iwon alyokon a Satan ka ikinupit ebe emam ibore ikiyakar iwon. Kisikwaani iwon eyakae yok ka nguluce ikipedori aanyun nguna nyikiyakar iwon. Nakwarina ikiyanyuni nabo nguna daadang ikiinaki iwon Akuj.

Anguna ka akingarakin iwon atamun ejok ikilos aripikin ngiwatin ngiuni: - Esubune alotooma ka esubune alokinga, nguna ke etau.

1. **Esubune alotooma** erae ngainakineta daadang ka ngapedorosio nguna ikiinakinit iwon Akuj. Akitoodikinet apedor angina ke erwor, apedor nginaseunet nguna kitiya, apedor ngina kipoet, apedor ngina kinokunet akim ...
2. **Esubune alokinga** erae ngiboro daadang ngulu ikiinakinit iyong Akuj alotooma ngatuketa kus, akitoodikinet; ngakipi, ngalup akolong, ngisukulo ka ngunace dang.
3. **Nguna ke etau** erae ngiboro daadang ngulu ikiyakar iwon anguna ka arucokina iwon ka Akuj, akitoodikinet, ngakujuwanisia, akilip, apedor ngina ka Akuj ka ngunace dang.

Nguna ke Ekarikon: Taanyunite ejok atemar eyenunito ileere ngikasyomak atiakatait ngina eyai kidding ngiwatin nguluuni lu eringa nyikobakina lotic ngolo etupakini.

ETIC ANATUKOT ANGINA CICI

Nguna ke Ekarikon: Totiakatiaka ngikasyomak alotooma ngatuketa ka inak ikes aenet angitorubei – ngakadia nguna angiboro:

Emaikina nginatukot. Toseu ngakadia nguna angiboro ngarwa ngaarei (2) ngatuketa.

1. Ngiboro ngulu iyakatar iyes anatukot
2. Ngiboro ngulu imamukatar iyes anatukot
- Totamutu nabo ngiboro (5) ngulu iyakatar iyes anatukot. Kigira ikes nakadia (kitotam ikes ngiwatin ngulu angiboro angulu uni angulu eringa iwon imario). Eyakatar adiotukot ngiboro kec alotooma ngakadia angulu ebasi nyikiyakatar a?

Angina epatania atemar emamukare iwon idiobore, nguna akire nu ebe ikiterereng iwon Akuj. Ikiinaki inges iwon nguna alalak. Akilo atamatam nguna nyikiyakar iwon, iitana esitiyata nguna ikiinaki iwon Akuj.

Tosyoma Mateo 25:20-23

- Nyaanu nguna etakanunete ngina ikisitiya iwon nguna ikiinakini Akuj?
- Ikisitiyae iwon nguna daadang ikiinakinit Akuj a?
- Alipite ikiruworor iwon ngulu ajokak akilo anakisitiya daadang ngulu ikiinak Akuj iwon?

Ngiketak

EKIYAN ANATUKOT ANGINA ALALAN

Itoodiunito ngaripiripata ebe epolok ngiboro ngulu eyakare iwon alotooma yok akilo ngiboro ngulu eyakare iwon alokinga yok. Ikwa ngikristayon ikiyanyuni iwon dang atemar epolok akilo ngiboro ngulu ke etau akilo anerae iyaatasi ikes akilo ngiboro ngulu esubunitae anguna yok.

Tosyoma eemut ngolo etupakini lo.

Alotooma ngiketak Constanza, eculat alotooma Caribbean, etaroko ngalup. Eya ngakipi nguna alalak ka ejok eyakae ka akwap anguna ka akitare.

Kelunyar ejie ngolo angakwapin ngolo angiarei, apotu ngijapanese ngulu apotu toema anakwap kec anguna angican kelunyar ejie toema nakwap ngin. Ngina alosioto ikes inaa amamukatar idiobore, ngilowi make ngulu anapito. Apotu ikes kimorikinos ka ngitunga ngulu ka akwap angina ka kitata kaapei ka ikes. Arae ngikabilae ngulu yaarei ngul ngikulyak ka angirikinito eyare. Kelunyar ngikaru 20 apotu ngiketak ngulu a Japanese tobara. Apotu toyakaunotor ngakais nguna apolok kibusak. Kikote neni dang, apotu ngiketak ngulu ka akwap angina torubakis erae ngikulyak ka eringa engirikinito akitare nguna etemokino anguna ka akimuj.



- Alipite epedorator nu?
- Anu apotu kitiyakin?

Ayakatar ngigurupo nguluyarei lu agogong ngina angiboro angulu ekwaan – ngiboro ngulu alokinga. Atyakatait bon arae ngatameta. Ngiboro ngulu alotooma. Anupito Ngijapanese ebe emaikina iyong kisitiyae jwi jwi agogong tari kegogong eyakae ka nyemakina iyong ajamakin. Anupito ngiketak ka akwap angina ebe nyilocokin akiyar kec. Anupito ikes ebe angina arakatar atapapa ka papaa kec ngikulyak ikes dang erubakinete erae ngikulyak.

Ngina egogongioto ngakiro amam nguna etiyaete ikes anerae anupito ikes ebe erae erot kec ngol.

- Alipite apoloo erot ngolo atamakinito ngitunga? Aluboro atamakinito ikes alotooma nu?
- Anu ikipedori iwon akisisaun aloemut alo?
- Nyaani ibore ipei ngini emaikina iwon etiyata egelaana ikwa ayakaunet ke eemut alo?

Nguna ke Ekarikon: Kingarak ngikasyomak ayenun ebe erae ngalup nguna ekwaan, Arae agelaanut nguna anupito ikes ka ngatameta kec. Amamukatar Ngijapanese ngiboro ngulu ajokak ngulu alokinga nait ekwaan ka ngiketak ngulu ka akwap angin. Ajokis ngina ayakatar Japanese arae nguna angiboro angulu alotooma - angulu asubunitere ikes. Ikipedori iwon dang ayakatar ngiboro ngulu alotooma erae kikisitiyae iwon akirot ngina ka Akuj akingarakinia ngatameta ka anupit yok.

Akitatamet 5: Erae Satan emodianot

Ngatameta nguna apolok

1. Erae Satan emodianot tari anakwap yok angina ikinyoma aloboro ikwa ngiticisio, akigyeno, etunganane, esubune ka nguluce erubakinit alyokonu keng ikiwuakinit iwon nakulyako.
2. Ikwa ngikristo iitana iwon ayenut nguna akire anerae ikilacakinete nguna akire.
3. Ikinyarit Akuj iwon akiwuapakin ngakwapin nguna nabo imoriyarito ayaun nguna akire lowaitin ngulu ka akiyar yok daadang.

Ngiboro ngulu iitana:

1. Ngitorubei — Ngakadia — 8 nguna ka amodiyo

Akisileerekinet

EKIYAN ANATUKOT ANGINA ALALAN

Tosyoma Yoana 8:44

- Alipite itamunitor engaet lo Satan?
- Nyaanu ngakitoodikinet ngadi nguna ka amodiyo nguna elimunit Satan?
- Itiyaunun amodio a Satan neni yok ngirwa lu a?

Erae Satan papa ka alyokonu. Nginapei anageunet emodiana inges ka erubakinit emodiana tari nakwarina. Ecamit inges iwon orakas ngulu ikikulyakaka ka ngulu ikinyamit akoro. Eteni inges atemar ani kikiwuapit iwon ngikisila ngulu ka Akuj ikitererengi Akuj iwon. nyecamit inges ngun kitiyaun, angun, ikimodianakini inges iwon.

Animodiyo ikilimokinit iwon Satan?

ETIC ANATUKOT ANGINA ALALAN

Ikimodianakini iwon Satan angirotin angulu alalak. Nakwarina ikiburori iwon ngamodianakinet ngadi nguna ikilimonokini inges iwon akiturubakinia ikikulyakaka.

Nguna ke Ekarikon: *Toripik ngakadia nguna eya kwap nu (ngitorubei). Kiteyenik ebe eyenunito ngikasiomak ngamodianakinet. Nyian nguna akire mono.*






Amodiyo ngina elimunit Satan



Erae etic ngilam ka egogos ngolo apotion. Ejok akitiya iwadio kepedor.



Nguna akire nguna ka Akuj

Ikisubunitae iwon akitiya. Abu Adam kitiya eringa inges nyesece. Erae epeirot ngolo ka akeroru yok ka erot ngolo epedorere iwon akituruun Akuj.

<p>Ikidounitoe iwon erae ngikulyak ka ikitwaki ikirae ngikulyak.</p> 	<p>Ikitererengi iwon Akuj erae kikikerit iwon inges.</p>
<p>Ikikulyakaka iwon nooi ka nyemaikina iwon ainakin ngitunga nguluce, emaikina ngitunga nguluce ikiinakis iwon.</p> 	<p>Nyiretakinitae tari ngikulyak akilo ainakin. Alotooma Malaki, elimokinit Akuj ngitunga ebe nyitererengitoe ikes anerae nyiwuakinito ikes Akuj kingaren. Abu Inges tolimok ikes ebe kikatakinae Inges ka toanyut nguna etakanunete erae kegeut ikes ainanakin ikwa ecikakinia Inges. litana iwon ainakin ikiyenunit ebe ikiinak iwon Akuj nginibore daadang ka etenit inges ainakin iwon daadang nguna ikitanit iwon.</p>
<p>Emitakinit Akuj nguna angitai.</p> 	<p>Emitakinit Akuj ngiwaitin ngulu ka akiyar daadang. Aponi kinyasunae ngiboro daadang alotooma apaki ngina ka asecit ka ecamit Inges akimorikin ngolowae akiyar yok daadang akinyakar neni Keng.</p>
<p>Ecamit Akuj iwon akitatam Evanjeli bon lokidunyet yok – nyiitana iwon amitakinit nguna iitanito ikes anawati kec.</p> 	<p>Ikilimokinit iwon Akuj amitakinit ngikidunyet yok. Ngina ikitatamia Inges iwon eemut ngolo angamesekin ka ngamee. Ikitatamuni Inges iwon ebe erae amina ainakin akimuj, ngakipi ka neni mecat. Ani ingisio atemar ngae ekidunyet, abu Yesu tolim eemut ke Esamaritanoit angolo abu toriam ekaloton ngolo aponi kidicae alorukude ka abu kimad inges kingarak.</p>
<p>Nyikipedorio iwon akibelekin ayokokiyar kemam akingarakinet angisilinga aneni aice.</p> 	<p>Ikiterereng Akuj iwon erikakin. litana iwon angaar ngakonyen yok aanyun daadang nguna adau Akuj ainakin iwon ka ageun akisitiya nguna. Ani ikisitiyae iwon nguna adau Akuj ainakin iwon ka akiterereng nguluce, angun ikitererengi Inges iwon. Anatutubet ka 1 aponi iwon kiyanae anguna ka aberu a Lee angina abu kingarak ngitunga anainakin ikes ngatameta bon.</p>

<p>Ejokak ngitunga ngice iloito ngulu. Emam isua apolou kori nyikitererengitae ka nyikimitakinitae isua.</p> 	<p>Ikisubunitae iwon daadang anakikwaanet ka Akuj ka ikimina Akuj iwon nooi, inges eyakuunia Lokoku Keng atwanare anguna yok. Emamete ngitunga ngulu itopolooritae ka ngulu itiditeunitae alobuku. Esubunit Inges daadang angipeipei alopite angolo ikicamitor Inges iwon ka eyakatar apolou anginitunganan.</p>
<p>Nguna iitatami Evanjeli erae nguna etapito nguna ke etau.</p> 	<p>Abu Yesu totwan anguna ka akisisilia ngiwaitin ngulu ka akiyar daadang, meere ca nguna ke etau bon.</p>

- Ipedorete iyes atamun nabo ngakiro ngaarei nguna epetuna anamodiyo a Satan a? (*Kigirakisi ikes nakadia ngaarei nguna nyigirir.*)

Nguna ke Ekarikon: Angun, topetakisi ngakadia daadang (kori todapakisi ikes narwatata ka kingitak ngikasiomak akiwuakin ngakwii (ngimare/ngakito nguna eupere ngikiel kori tocieta akaritas ka akalam) kidiana namodiyo ngina anupito ikes kori enupito.

ETIC ANATUKETA ANGUNA CICIK

Ikiinakinio iyong ngamodianakineta ngaarei nguna epetuna totamak nyaanu nguna akire nguna Akuj anamodianakineta anu?.

KINYAKUTU NU NATUKOT

Nyaanu nguna eyaunete ngamodianakineta nu?

EKIYAN ANATUKOT ANGINA ALALAN

Eyauni amodiyo a Satan nguna alalak nakiyar yok.

Tosyoma eemut lo:

Erae akwap a Israel neni lala adeudeu. Kikote neni dang, eyai ibore ngini egelaana analongisat ana. Nyeyakatar ngiwaitin ngice analongisat ngaraito kori ngamoni elapat ngiwaitin ngulu emam ibore eyai ka eonit. Eyakatar ngiwaitin ngulu analongisat ana amoni. Edupitae ngiwaitin ngulu ka alongisat ngaraito nguna alalak ka ngatur nguna alalak nguna egyelanarete ikes nakwapin daadang. Anguna anyo eyakatar ngamon diyete alongisat? Erae ngitunga ngulu iboiyete analongisat erae ngimarabui, enupito ikes atemar erae Allah ilamit akwap kec. nyitiyaete ikes idiobore anerae anupito ikes ebe emam nyejokak ngalup kec ka nyeraunete nguna ajokak. Ngitunga ngulu iboiyete analup angun erae ngiyudayan enupito ikes atemar erae akwap kec ngina aponi kiikinae ikes ngina abu Akuj inaki ikes. Enupito ikes ebe erae akwap ngina eleliata ngakile ka ao ikwangina iikinitor Ebaibul. Enupito ikes ebe elimokinit ikes Ebaibul akidar ngalup, akipuka ka akitiya tooma keng. Angun, apotu ikes kisitiyata amukianut kec atamun ngirotin ngulu kilounet ngican ngulu ka amamukau ngakipi. Apotu ikes toriamut ngirotin ka todupakis ngamon. Abu Akuj kitereng agogong kec ka eyakatar tokona ikes nguna alalak nguna edeparito nguna isitiyaete ikes.

- Anitiakatait ayai kiding ngimarabui ka ngiyudayan?
- Anitiakatait ayai alotooma nguna abu akwap kitolom alokiding akwap ngina alomito ngimarabui ka ngina angiyudayan?

Nguna ke Ekarikon: Kingarak ngikasiomak aanyun ebe nguna anupito ngimarabui erae nguna ka amodiyo a Satan ka anguna angun, erae akwap kec akonginait. Apotu ngiyudayan tonupa nguna kire nguna ka Akuj ka ayakatar ikes nguna alalak akilo ka epedorito dang agielanar nakwapin ngunace.

Kingolekisi nabo ngakadia nguna ka amodiyo. Anguna anginamodiyo totamak atyakaku kiding idio ngini enupit nguna ka amodiyo ka ngini enupit nguna kire nguna ka Akuj. Akitoodikinet angina ka a 1 - erae etic ngilam. Ani kenupit idio atemar erae etic ngilam nyepedori akitiya. Irikakinete ikes etic atipei ariamunia nguna itemokino akimujia akolongit ngin. Nyelakara ikes itiyaete ka iwarito nginapaki ngirotin ngulu kitiyaet etic ngolo edit kepedor, kikote neni dang. Ani kenupit itunganan ebe erae etic eyakaune ka akeroru yok ka erot ngolo epedorere iwon akituruunio Akuj angun epedorete ikes akitiya ka agogong. Ani kitiyata ikes ka agogong epedorete ariamun nguna alalak anguna ke etic kec. Epedorete ikes tari akidangidangakin tari kegogong etic ka nyejamakinete ikes ngun atipei.

EKIYAN ANATUKOT ANGINA CICI

Toburosi nginamodiyo ka kiyana nguna eyauni nginamodiyo.

KINYAKUTU NU NATUKOT

Totamakisi ngakilocokineta nguna iyanyunete iyes anatuketa kus erae kerae tonupite nginitunganan daadang nguna akire akilo amodiyo.

- Kerae mono atukot kus ngina ajokan kori ngina inyasuna?
- Kerae mono atukot kus lopite ngolo ecamitor Akuj kori kinyasuna?

Ikwa ngikasiomak, oyaasi adiopaki elipa ikotere ebilibiliari Akuj apedor ngina ka amodianut anakwap yok ka engarakisi ngatameta yok kibekekin nguna akire.

Alipite ikilemaria iwon nguna ka amodiyo?

EKIYAN ANATUKOT ANGINA ALALAN

Tosyoma Yoana 8:31-32 *Abu Yesu tolimok ngiyudayan ngulu anupito Inges tema: Ani kiricakis iyes ngakitatameta "Irakasi iyes kire ngikewuapak Kang. ³² Angun, iyenunete iyes nguna akire ka ikilacakinete iwon nguna akire."*

- Alipite ikiyenunia iwon nguna akire?
- Anu itiyaunete nguna akire? (Ikilacakinete iwon aneni ka anu?)

Ani kicamit iyong alacakino anamodiyo a Satan, iitana nguna akire anguna eponito aneni ka Akuj. likinit Akuj akiyakikin ngikristayon "Etau ngolo anguna akire ngolo ikitenakini iwon alotooma nguna ka ayeunun daadang. (Yoana 16:13) kilipa ikotere ikitoodikini iyes Akuj nguna akire ka akiyaa apaki akisyom Ebaibul ka ayenun nguna Keng nguna akire.

Akitatamet 6: Aripun nguna litana

Ngatameta nguna apolok

1. Akiteyenun ngakiro neni angatuketa
2. Akingarakin atukot atamunia ngirotin ngulu epedoria atukot kec akilocokin.
3. Akingarakin ayeun nguna epedorete ayaun akilocokinet natukot

Ngiboro ngulu iitana

1. Ngakaritasia nguna apolok
2. Ngakadia nguna nyigirir

Akisileerekinet

ETIC NGOLO KA ATUKOT ANGINA ALALAN

Adoketai ngina etupakini anguna ka ayaun akilocokinet natukot yok erae akingolikin ejok atukok yok ka ayeun anutiokisio eyakasi nguna ikilomakinito iwon ka nyaani akigieno yok anguna amoi.

Nguna ke Ekarikon: Toseutu anoot ngina ka “Adola” kori anoot ngina anakwap kus ngina angisilinga angulu ekudioko, ngina eyenikinito ngitunga daadang kisiyook ngakingiseta nguna eya kwap anguna ka anoot angina (anoot ngina ka aliput) kingitak atukot abongokin ngakingiseta nu:-

1. Ngarwa ngaa i giritere enamba 1000 ananooit?
2. Ngarwa ngaa i giritere akirot “apeiliput” nanooit?
3. Ai eyai enamba ngolo eyenitere anooit ngin? “Seriel”
4. Alirangi enamba ngolo ka anoot (seriel)?
5. Alityang eyai kau ka anoot?
6. Nyo itiyae atiang?
7. Anukiro igiritae kidiama nanooit?
8. Anu kiro eya kau alokidiana anoot?
9. Ali rangi eyai kedieny aikienyit angina iworitoe iwon alokau anoot?

Ngapakyo ngace ikiyenikinit iwon idiobore ngini nyemitakinitae iwon akitere nabo. Apolou ngina ke etic alo erae akingarakinia atukot aanyun nabo ka atamun epite ngolo epedorere akingarakin.

Ngikalya

ETIC ANATUKOT ANGINA CICI

Toramak ngitorubei angabolyasio angauni nakaritas ngina apolon. Kigirak nabokisio neni ebala: ekulyakaka nooi, ekulyakaka ka ebarito. Alotooma nginabokis kitotamutu epite ngolo eyakaunor ekal edio nakigiret anginabokis, kingitak ikes toanyunito ngiboro ngulu ikote:

- | | |
|-----------------|------------|
| • Aliyakae akai | • Nginapen |
| • Akimuj | • Asiomit |
| • Ngibaren | • Etic |
| • Ngalup | |

Ani kirikakis ikes kingitak ngikasyomak ainakin etyae alotooma amiat ngolo angitunga anatukot kec ngulu eyakasi ngina bokis alotooma ngunauni.

Akitoodikinet:

Ebarito	Ngikulyak	Ngikulyak nooi
Akai neni perot ngina ajokan, emucele, ngilowi ngulu asegak, DVD, ngaatur, ngikicolongo, eyai akimuj ngina imujio ngarwa ngauni apeikolongit ka apei ka airing acekolongit, Nyenyamit ngidwe akoro, elosete akisiom.	Eyakatar apei kai bon ngina emam ibore eyai tooma. Akimuj ngina itemokino apei kolongit bon, ngilowi ca ngidi Imujete ngakwi ka arunget bon.	Akai ngina eukoro – ngina emam ibore eyai tooma. Akimuj ngina itemokino apei kimujet bon apaaran daadang, emucele ka acumbi. Emam ecebore imujiata.

Atukot

ETIC ANATUKOT ANGINA ALALAN/CICI

Nguna ke Ekarikon: Kitaramak ngikasiomak daadang amapu ngina ke ere kec.

Ani kitatam iyong ngikasiomak ngulu eponito aloreria angulu edeparito epei, totiak ikes angologurup alore kec.

Ani kedeparito ngitunga 6 alore ke epei totiak toruworos ngigurupo ngiarei ka toramak ngologurup amapu ngina ke ere kec: Ani kirikakis ngikasyomak aramun ngitorubei angamapua kisiwuak ikes ngiwaitin lu lotorubei angamapua angun.

- Neni eriamunitor ngitunga ngakipi aloreria kec
- Ngisukulo, ngidakitarin, ngimaketa ka nguluce dang
- Ngikelesiyae kori ngikanisae ngakiboisio nguna apolok nguna ilipere
- Neni eriamununuyeta ngitunga ngakito nguna ipoere
- Ngirukudei ngulu apolok ka nguluce dang
- Neni ebolyare


Ani kirikakin ngitorubei angamapua kisikwaanikis ikes ngamapua aanyunia nguna egelaaka ka nguna ikwaan. Ani kerae ikes ngulu angireria angipie angun eriamunete ikes ngatameta alotooma kec make aloboro angulu acepaki keponi kimuriakinae.

Ani kirikakis ngitorubei angamapua anu, toramakisi amapu ngina angaarei ngina itoodiuni eyakae ngolo ecamitotor ikes ngireria kec kikokis kori toyakaunotor alotooma ngikaru ngitomon ngulu eponito. kingitak ikes kisileereut nguna eyatakis ikes namapua ka anguna ainyo elocokis ikes. Alurotin egelaakiata ikes anamapua angina ke ekingaren? Kigirakisi angapepei ngakilocokinioto nguna apolok nguna ka atukot – kigira longaet ngolo ka akitatam aloripot.

Akisibak ngiticisio

ETIC ANATUKOT ANGINA ALALAN/CICI

- Totamutu ngakilocokinet nguna icamito iyes kitiyaun alokalya kus; kigira nu angapepei nakadia.



2. Kiyatakisi ngakilocokinet nguna ka atukot/ngireria lotorubei ngulu angamapua ka kigira ikes nakadia kiwuakis ngakadia kaapei. Kingitak ngikasyomak toburosi ka toanyut keyakasi ngakilocokinet nguna igyenosi ikes toyakaun nguna nyigiritae.
3. Toseanakisi ngakadia anatiaketa angauni etukonoro alopite alo:-
 - Anguna angakadia anguna itopolooritae akilo toceta akad ngarwa ngauni
 - Anguna angakadia anguna itopolooritae iwadio toceta akad ngarwa ngaarei
 - Anguna angakadia anguna nyitopolooritae toceta akad apeicetaret
4. Kimarakisi ngakadia kaapei nabo ka kingitak ngikasyomak toseta alopite angolo epatania ationis alemar, epatania alemar ka ngina kongina ka etiono alemar.
 - Toceta ngakadia nguna epatana alemar ationis ngarwa ngauni
 - Toceta ngakadia nguna erae kongina ngarwa ngaarei
 - Nguna etiono elemare toceta apei
5. Toriamutu ngakadia nguna eya ngacetaret 6 (kori ngacetaret 5 erae kemam ngina 6). Erae nu ngakadia nguna aarei nguna apolok nooi ka nguna epatana akitiyakin.
6. Alotooma ngakadia nu toseu apei kori ngaarei nguna icamit iyong ageunia.

Yaasi apaki kilipa anagolokinet ka kingita torubak ikigangit alotic kus. Ani keyakaun apaki adio kisimukek atukot togeut nguna kitiya anguna ke etic angolo ka Amina angolo etupakini.